

Date –08/10/2023

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizoram mamawh bungraw phurtu inzawmkhawm, Joint Action Committee chuan Mizoram ei leh bar lakluhna kawng chhe lutuk siam that phutin naktuk atangin Sairang leh Vairengte inkarah tlan rih loh an tum.
2. Cheng Nuai 685 senna tur Sapthei sawngbawlina hmunpui dinna tur lung nimin khan Minister Pu TJ Lalnuntluanga'n New Champhai-ah a phum.
3. Sorkar laipui hnuai Inter-Ministerial Committee-in vawiin atang hian Sikkim-a tuilian vanga chhiatna thlenna hmunte an tlawh kual dawn.
4. Palestinian hel pawl Hamas-in Israel an beih avanga thi zat chu 40 an tling tawh a, midang 700 chuangin hliam an tuar bawk.

JAC

Mizoram mamawh bungraw phurtu inzawmkhawm, Joint Action Committee chuan Mizoram ei leh bar lakluhna kawng chhe lutuk siam that phutin naktuk Thawhtanni atangin Sairang leh Vairengte inkarah tlan rih loh an tum tih an sawi.

Joint Action Committee-ah hian Mizoram Truck Owners' Association, Truck Drivers' Association, Mizoram Tippers Driver and Owners Association, Mizoram Oil Tanker Drivers Association leh Kolasib District Drivers Welfare Association te an tel a. Mizoram Truck Owner Assn. President B. Lalzarzova chuan tunah hian Mizoram ei leh bar lakluhna kawng - Sairang leh Vairengte inkar, Kawlkulh atanga Hliappui, Kawlkulh atanga Tuichang te bakah Aizawl leh Imphal inkar te chu a chhe nasa hle, a ti a. Kawng chhe zual tal siam that a nih loh chuan naktuk Thawhtanni atangin bungraw phur motor zawng zawng Sairang leh Vairengte inkar leh Manipur lam atanga châk lakna kawnga tlan thin te an tlan dawn lo a ti a. An hmalakna zawmin Kolasib Maxi Cab te pawhin tlan loh an tum tih a sawi bawk.

An President sawi dan chuan Mizoram kawng chhe chungchang hi thuneitute hnenah an lo thlen tawh thin a; sawrkarin a thawm that mai beiseiin hun rei tak an nghak a, hmalakna engmah a awm mai loh avangin tun dinhmun hi an thleng ta a ni. Kawng chhiat avangin lirthei tam tak a che sual a, thenkhat a chhiat phah a, he'ng harsatna hrang hrang thleng avang hian kawng chhia chu naktuk zing dar 7 atangin zawh rih loh phawt ni se, tlanna tlaka thawm that a nih hma loh chuan kawng chu zawh rih loh mai ni se, an ti a ni.

Joint Action Committee chuan an hmalakna chu Mizoram kawngin hma a sawn theih nana ti an nih avangin thlawp theuh turin mipui an ngen a ni.

Hetihlai hian nimin tlai khan Chief Minister Pu Zoramthanga hovin Mizoram PWD hotute leh Joint Action Committ. For Plyable Road chuan Lailapur leh Sairang inkar kawng chhia siam that thuai dan tur sawihovin hmalak dan tur hrang hrang an duang ani.

<><><>

Lengteng Assembly Constituency Students Aid

Lengteng Assembly Constituency leh Sialkal Range Development Council (SRDC) huam chhunga zirlai thiam thei, chhungkaw harsate tanpuina leh Board Exam-a Distinction-a pass-te hnen ah nimin khan Smartphone leh Laptop hlan an ni.

Aizawla Mizoram State Archive Conference Hall-ah Lengteng bial chhung zirna in atanga HSLC Distinction-a pass zirlai 8 te chu Smartphone hlan an ni a, HSSLC Distinction-a pass zirlai 2 hnen ah Laptop hlan an ni bawk a. Hemi rual hian First Division-a pass chhungkaw harsa zirlai 23 leh SRDC Area huam chhunga zirlai 22-te chu tanpuina tangka fai hlan an ni.

He hunah hian SRDC Chairman, Lengteng bialtu MLA, Dr L.Thangmawia chuan tanpuina dawng zirlaite a lawmpui thu a sawi a. A bial chhunga zirlaiten zirna kawnga inelna thianghlim an neih beiseiin Distinction-a pass chin te Smartphone leh Laptop pek thin an nih thu te, zirlai thiam thei chhungkaw harsate khai chhuah nan admission fee, Uniform leh lehkhabu man daih tura ngaih tanpuina pek thin an nih thu a sawi a. Hei hi inthlan dawn kuma tih tan ni lovin kum 2019 atanga tih tan a nih tawh thu leh heng zirlai tanpuina dawng tur hi Ngopa BDO Chairman-na hnuaiah party induhsakna awm lo va committee-in a thlan thin thu a sawi.

He hunah hian Lengteng bial zirlai 23-te tan hian Lengteng bial MLA Fund atangin Cheng Nuai 3 Sing 4 Sang 5 leh SRDC Area-a zirlai 22 te tan SRDC Fund atangin Cheng Nuai 3 Sing 1 Sang 4 sem ral a ni.

<><><>

Kolasib

Minister Pu K. Lalrinliana, Kolasib bialtu MLA chuan nimin khan Formosa Foundation India kal tlanga hmuh Mini Ventilator chu District Hospital Kolasib hnenah hlanin, Kolasib Sub-Headquarters YMA hnuaia Branch thlan bik 20 hnenah Oxygen Concentrator a hlan bawk.

Minister chuan Formosa Foundation India-in COVID-19 hri len laia tanpuina chi hrang hrang an kalpui dan leh sawrkar a chhawk zangkhai dan te a sawi a. Oxygen Concentrator-te chu damlohna leh chetsual thilah mamawhna a sang chho zel a, damdawi ina inenkawl ngaihna awm tawh lo, in lama inenkawlte tan a pawimawhin a tangkai leh zual a, khua leh veng tinah kawl theih ni se duhthusam a ni, a ti a. Tun tuma dawng ve lo leh la nei lote tan pawh ngaihtuhsak zel a tum thu a sawi a ni.

He hun hi Kolasib Sub-Headquarters YMA Vice President Pu C. Lianlunga'n a kaihruai a ni.

<><><>

Champhai - Passion Fruit

Cheng Nuai 685 senna tur Sapthei sawngbawlina hmunpui, 'Passion Fruit Processing Unit' dinna tur lung chu nimin khan Minister Pu TJ Lalnuntluanga'n New Champhai-ah a phum.

Hemi puala inkhawm, Champhai DC Pu James Lalrinchhana kaihhruaiah Minister chuan, Champhaia kuthnathawktu sapthei chingtuten an harsatna leh mamawhnate a hnena an lo thlen thin chu bawhzuiin 'Passion Fruit Processing Unit' Champhaia din tur hian Sawrkar Laipui Ministry of Food Processing pawh tum engemawzat an dawr thu leh NEC hnuaiah tih hlawhtlin a nih tak thu a sawi a.

'Passion Fruit Processing Unit' chu hmasawna daih rei leh tlo neih theihna tura hmalakna pawimawh tak a nih thu sawiin, State leh District economy

chawikanna tura project pawimawh tak a ni, a ti a. He project hmalakna kal mekah hian Mualkawi leh Ngur khuaah te Horticulture Department hmalaknain a hma hruaitu atana kuthnathawktuten sapthei an chin chhoh mek thu a sawi a, he project hi a hlawhtlin ngei theih nan kuthnathawktute chu lo inpuahchah tur leh thawhhopuiah a sawm a ni.

(Lahlpuia Champhai PTC)

<><><>

Akashvani PTC Interview

Akashvani Aizawl, Regional News Unit-in Aizawl, Saitual, Khawzawl leh Hnahthial-a thawk tur Part Time Correspondent (PTC) a lak tura dilna thehlutte chu naktukah Interview turin Akashvani, Aizawl Station, Tuikhuahtlangah inlan tur a ni.

Interview hi chawhma dar 10-ah tan a ni ang a. Diltute chuan Original Marksheet leh lehkha pawimawh dang, anmahni tichiang theitu ken vek tur a ni.

<><><>

Serchhip Election

Kumina State Assembly inthlanpui buatsaih tur pualin Serchhip-ah ngawrh taka inbuatsaih mek a ni a; nimin khan Additional DC Pu James Lalnithanga hovin Serchhip DC Conference Hall-ah inthlan buaipuitu turte inhmukhawmin District chhunga Assembly Constituency 3-a candidate-te campaign senso chhûtna atana hman tur thil man an bituk.

Election Commission of India chuan Mizoram Legislative Assembly Inthlanpuiah hian Candidate tin in inthlan sensoah Cheng Nuai 28 aia tam an hmang tur a ni lo tiin a bituk a. Inthlan puan a nih atangin party tin te campaign senso chhut tan a ni tawh dawn a. Senso awm thei tur ni awm anga lang chi hrang hrang – aurinna, pandal siam, flag, poster, banner leh hoarding, lirthei hawh man, ei tur leh riah man, hall leh thuthleng hawh man leh a dangte bakah electronic, print leh social media-a fakna chhuah man te chu ngun taka ngaihtuah a ni a. Rate hman lai mek te sawiho in lungual takin an bithliah a ni.

<><><>

Lalpa Chiahhlawh Intelkhawm

Lalpa Chiahhlawh Intelkhawm hruaitu Rev. Dr. Zaichhawna Hlawndo chuan Serlui Assembly biala an pawl aiawha ding tur chu Pu Vanlalnghaka, Saipum khua a nih thu Kolasib Press Club-ah nimin khan a puang.

Dr. Zaichhawna chuan, Lalpa Chiahhlawh Intelkhawm chu bial tina ding tura an inbuatsaih mek thu leh independent-a ding tur zawng zawng chuan thuthlung pakhat, symbol pakhat ‘zungbun’ an hmang dawn tih a sawi a. Pathian Lalram Sawrkar Hmathlir chu Party Manifesto ang a ni lo va, khawvel rama la ding ngai lo, democracy rama la piang ngai lo ram leh hnam din chhuahna tur leh Zofate mahniah ro inrel, independent nation kalkawng tur a ni, a ti.

(Andrew Vanlalauva Kolasib PTC)



SIKKIM DISASTER

Sikkim-a tun thla ni 4-a Teesta lui-a sabereka khuangkaih vanga thi zat chu 30 an tling tawh a, an zingah hian sipai 9 an tel a, midang 81 chin hriat lohvin an la awm bawk.

Sikkim Disaster Management Authority (SSDMA) sawi danin, tuilian vang hian chenna in 1320 a chhe vek a, chhanchhuah hna thawk tuten mi 2563 chhanchhuakin hliam tuar 26 an awm a ni. Tuilian vanga harsatna tawkte tana Relief camp 30 siam-ah mi 7025 an awm mek a, tuilian hian Lei 13 a hnawl chhe vek bawk.

Union Minister of State for Home Affairs, Ajay Kumar Mishra-a'n nimin khan Rangpo tlawhin chhياتna thlen dan a enfiah a, chhawmdawl hna thawh kawngah sorkar laipuiin theihtawp a chhuahpui dawn tih a sawi a ni. Hetih lai hian, Union Home Ministry din, Inter Ministerial Commt. in vawiin atang hian tuilian tuarna hmunte an fang kual dawn a ni.



GAZA CONFLICT

Palestinian hel pawl Hamas-in Israel an beih avanga thi zat chu 40 an tling tawh a, midang 700 chuangin hliam an tuar bawk. Thi leh hliam zat hi a la pun chhoh rin a ni. Puan tawh angin Hamas hian nimin khan rocket-in Israel chhim lam an kap thut a, Hamas hian ramri bulah Israel sipai engemawzat an man niin an sawi a ni.

Israel Prime Minister Benjamin Netanyahu chuan indo Hamas helho lakah indo puangin Israel sipai-ten Operation Iron Swords tia vuah, beihpui an thlak ve nghal a, boruak atangin Gaza Strip-a Hamas-ho tawmna-te an kap a ni.

Hetih lai hian Hamas helho-in Israel an bei chu ram hrang hrang hruaituten an dem thu an sawi a, Prime Minister Narendra Modi-a pawhin Israel laka Hamas chet dan chuan a thawng tak zet tih sawiin Israel-in hun khirh tak a tawng mek a ni, a ti a, India chu Israel tan a ding tlat dawn tih a sawi bawk.

